



# ՀԵՌՈՒՍԱՏԵՍՈՒԹՅԱՆ ԵՎ ՌԱԴԻՈՅԻ ՀԱՆՁՆԱԺՈՂՈՎ ՈՐՈՇՈՒՄ

08 մայիսի 2024 թվականի թիվ 47-Ա

ք. Երևան

## «ՀՈՎՆԵՏ» ՍՊ ԸՆԿԵՐՈՒԹՅԱՆ ՆԿԱՏՄԱՄԲ ՎԱՐՉԱԿԱՆ ՏՈՒՅԺ ԿԻՐԱՌԵԼՈՒ ՄԱՍԻՆ

Հեռուստատեսության և ռադիոյի հանձնաժողովը (այսուհետ՝ Հանձնաժողով), ուսումնասիրելով 2024 թվականի ապրիլի 15-ին իր նախաձեռնությամբ հարուցված թիվ 17 վարչական վարույթի նյութերը՝ **պարզեց**.

Հանձնաժողովը «Տեսալսողական մեդիայի մասին» օրենքով (այսուհետ՝ Օրենք) վերապահված իր վերահսկողական գործառույթներն իրականացնելիս հայտնաբերել է Օրենքի պահանջի խախտում, այն է՝ ցանցային օպերատորի գործունեություն իրականացնող «ՀՈՎՆԵՏ» ՍՊ ընկերության (այսուհետ՝ ցանցային օպերատոր) կողմից տեսալսողական ծրագրերն առանց պայմանագրի վերահաղորդում իրականացնելու Օրենքի դրույթի պահանջի խախտման փաստը:

Հանձնաժողովը, ղեկավարվելով Օրենքի 32-րդ հոդվածի 1-ին մասի 14-րդ կետով և 42-րդ հոդվածով, համաձայն որի՝ Հեռարձակողների գործունեության մշտադիտարկումն իրականացվում է ուղղակի դիտարկման, իսկ օպերատորի դեպքում՝ նաև տեղում դիտարկում իրականացնելու միջոցով, և հիմք ընդունելով Հանձնաժողովի նախագահի 2024 թվականի ապրիլի 10-ի թիվ 17-Ա հրամանը, իրականացրել է ցանցային օպերատորի մոտ մշտադիտարկում՝ տեղում դիտարկում իրականացնելու միջոցով:

Տեղում դիտարկում իրականացնելու արդյունքում 2024 թվականի ապրիլի 15-ին Հանձնաժողովի ծրագրերի մոնիտորինգի և վերահսկողության վարչության կողմից կազմվել է արձանագրություն, համաձայն որի՝ ցանցային օպերատորի հեռարձակող կայանում ժամը 13:45-ից 14:15-ն իրականացված մշտադիտարկման արդյունքում պարզվել է, որ ցանցային օպերատորի կողմից վերահաղորդվում են թվով 30 հետևյալ տեսալսողական ծրագրերը՝ «Первый канал HD», «Fox», «Индийское кино», «Родное кино», «Дом кино», «Кинохит», «Кинопреьера», «НТВ», «REN TV», «365 дней», «ТНТ», «Перец», «Телекафе», «5-ий канал», «ТБЦ», «СТС», «Бобёр», «National Geographic», «Nat Geo Wild», «Кухня», «Nikelodeon», «MTV 00s», «TNT music», «RU TV», «Mezzo», «Карусель», «С2», «Боец», «Мир 24», «ABN»:

Հանձնաժողովի ծրագրերի մոնիտորինգի և վերահսկողության վարչության կողմից իրականացվել է նաև ցանցային օպերատորի գործունեության մշտադիտարկման արդյունքների արձանագրությունում նշված վերահաղորդվող տեսալսողական ծրագրերի և ցանցային

օպերատորի կողմից 2024 թվականի փետրվարի 19-ին Հանձնաժողով ներկայացված վերահաղորդվող տեսալսողական ծրագրերի ցանկի համադրություն, որի արդյունքում պարզվել է հետևյալը.

Ցանցային օպերատորի կողմից փաստացի ներկայացված վերահաղորդվող տեսալսողական ծրագրերի ցանկում ներառված «Yerkirmedia TV», «AR TV», «Бокс ТВ», «Кинокомедия», «Время:далекое и близкое», «Музыка Первого», «СТС Кидс», «Изнестия», «Домашний», «РБК», «BRIDGE TV», «BRIDGE TV РУССКИЙ ХИТ», «BRIDGE TV шлагер», «BRIDGE TV Hits», «BRIDGE TV DELUXE», «BRIDGE TV FRESH», «BRIDGE TV CLASSIC» և «ЦТВ» տեսալսողական ծրագրերի վերահողորդում արձանագրությունը կազմելու պահին չի իրականացվել, ինչն արգելված չէ օրենքով:

Միաժամանակ պարզվել է, որ ցանցային օպերատորի կողմից ներկայացված վերահաղորդվող տեսալսողական ծրագրերի ցանկից բացակայում են «Родное кино», «Кинопреьера», «НТВ», «ТНТ», «MTV 00s», «RU TV», «Mezzo», «Боец» և «Мир 24» տեսալսողական ծրագրերը, որոնք փաստացի վերահաղորդվել են արձանագրությունը կազմելու պահին:

Հարկ է նշել նաև, որ ցանցային օպերատորի կողմից ներկայացված վերահաղորդվող տեսալսողական ծրագրերի ցանկում առկա և արձանագրություն կազմելու պահին վերահաղորդվող «Кинохит ТВ», «Индийское кино», «Кухня», «365 Дней ТВ», «ТНТ Music», «Карусель», «Дом кино», «Бобёр», «Первый канал:всемирная сеть» և «Телекафе» տեսալսողական ծրագրերի գործողության ժամկետը համաձայն ընկերության կողմից ներկայացված ցանկի նշագրված է 31.12.2023թ., «National Geographic», «Nat Geo Wild», «Nikelodeon» և «Fox» տեսալսողական ծրագրերի գործողության ժամկետը՝ 30.12.2023թ., իսկ «СТС», «РЕН ТВ», «5 Канал», «Перец» և «ТБЦ» տեսալսողական ծրագրերի գործողության ժամկետը՝ 15.03.2023թ.:

Հանձնաժողովը, ղեկավարվելով «Վարչարարության հիմունքների և վարչական վարույթի մասին» օրենքի 30-րդ հոդվածի 1-ին մասի բ) կետով, 2024 թվականի ապրիլի 15-ին ցանցային օպերատորի նկատմամբ հարուցել է վարչական վարույթ՝ հիմք ընդունելով Հանձնաժողովի ծրագրերի մոնիտորինգի և վերահսկողության վարչության կողմից ցանցային օպերատորի գործունեության մշտադիտարկման արդյունքների հիման վրա 2024 թվականի ապրիլի 15-ին կազմված մշտադիտարկման իրականացման և արդյունքների վերաբերյալ արձանագրությունը, որն Օրենքի 42-րդ հոդվածի 18-րդ մասի համաձայն հիմք է հանդիսանում վարչական վարույթ հարուցելու համար, իսկ հարուցված վարչական վարույթի շրջանակներում ծառայում է որպես վարչական վարույթի ապացույց:

Հանձնաժողովը հարուցված վարչական վարույթի մասին 2024 թվականի ապրիլի 17-ին ծանուցել է ցանցային օպերատորին և հայտնել, որ այս հարցի վերաբերյալ կարող են ներկայացնել իրենց պարզաբանումները և բացատրությունները:

Ցանցային օպերատորը 2024 թվականի ապրիլի 18-ին գրությամբ Հանձնաժողով է ներկայացրել «ՀԻՐՐԻԴ ՓՐՈԴԱԲՇՆ ԷՆԴ ԴԻՍՏՐԻԲՅՈՒՇՆ» ՍՊ ընկերության և «ՀՈՎՆԵՏ» ՍՊ ընկերության միջև 2022 թվականի դեկտեմբերի 30-ին կնքված համաձայնագրերը 2021 թվականի մարտի 17-ին կնքված տեսալսողական ծրագրերի վերահաղորդման իրավունքի տրամադրման պայմանագրում փոփոխություն կատարելու վերաբերյալ, և «ԹԻ ՎԻ ԿՈՆՏԵՆՏ ՍԵՐՎԻՍ» ՍՊ ընկերության և «ՀՈՎՆԵՏ» ՍՊ ընկերության միջև 2024 թվականի հունվարի 01-ին կնքված թիվ 024 պայմանագիրը վերահեռարձակման իրավունքը փոխանցելու մասին:

Հանձնաժողովի կողմից ուսումնասիրվել են ցանցային օպերատորի կողմից ներկայացված ապացույցները, որի արդյունքում պարզ է դարձել, որ ըստ ցանցային օպերատորի կողմից ներկայացված 2022 թվականի դեկտեմբերի 30-ին կնքված համաձայնագրերի՝ «Nikelodeon», «Nat Geo Wild», «Fox» տեսալսողական ծրագրերի վերահաղորդման վճարման ժամկետ է սահմանված 01.01.2024թ.-31.12.2024թ., իսկ «National Geographic» տեսալսողական ծրագրի համար՝ 01.01.2023թ.-31.12.2023թ., ինչպես նաև «ԹԻ ՎԻ ԿՈՆՏԵՆՏ ՍԵՐՎԻՍ» ՍՊ ընկերության և «ՀՈՎՆԵՏ» ՍՊ ընկերության միջև 2024 թվականի հունվարի 01-ին կնքված թիվ 024 պայմանագրի Հավելված 1-ի, ի թիվս այլնի, ցանցային օպերատորն իրավունք է ստացել 2024 թվականի հունվարի 01-ից մինչև 2024 թվականի դեկտեմբերի 31-ը ներառյալ վերահաղորդել «CTC», «PEH TB», «5 Канал», «Перец» և «TBL» տեսալսողական ծրագրերը:

**Հանձնաժողովի հիմնավորումները (պատճառաբանությունը) և եզրահանգումը.**

Այսպիսով, վարչական վարույթի բազմակողմանի, լրիվ և օբյեկտիվ քննության, ձեռք բերված ապացույցների ուսումնասիրության և գնահատման արդյունքում Հանձնաժողովն ամրագրում է հետևյալը.

**Օրենքի 2-րդ հոդվածի 1-ին մասը սահմանում է՝**

«Հայաստանի Հանրապետության տեսալսողական մեդիայի մասին օրենսդրությունը ներառում է Հայաստանի Հանրապետության Սահմանադրությունը, «Տեսալսողական մեդիայի մասին», «Ձանգվածային լրատվության մասին», «Էլեկտրոնային հաղորդակցության մասին», «Հեղինակային իրավունքի և հարակից իրավունքների մասին», «Լեզվի մասին», «Գովազդի մասին» օրենքները, Հայաստանի Հանրապետության ընտրական օրենսգրքը, կարգավորող պետական մարմնի իրավական ակտերը, տեսալսողական մեդիայի ոլորտը կարգավորող այլ իրավական ակտեր և Հայաստանի Հանրապետության միջազգային պայմանագրերը»:

Համաձայն Օրենքի 32-րդ հոդվածի 1-ին մասի 14-րդ կետի՝ Հանձնաժողովն իրականացնում է Հեռարձակողների և օպերատորների գործունեության մշտադիտարկում:

**Օրենքի 42-րդ հոդվածի 1-ին, 3-րդ, 11-րդ և 18-րդ մասերը սահմանում են՝**

«1. Հեռարձակողների գործունեության մշտադիտարկումն իրականացվում է ուղղակի դիտարկման, իսկ օպերատորի դեպքում՝ նաև տեղում դիտարկում իրականացնելու միջոցով: Ուղղակի դիտարկման արդյունքները կարող են համադրվել տեսալսողական հաղորդումների հաշվառման էլեկտրոնային մատյանների տվյալներին:

3. Տեսալսողական մեդիայի մասին օրենսդրության պահանջների խախտման վերաբերյալ տեղեկություններ ունենալու դեպքում օպերատորի գործունեության տեղում դիտարկումն իրականացվում է կարգավորող պետական մարմնի նախագահի հրամանի հիման վրա:

11. Մշտադիտարկման արդյունքների մասին արձանագրությունն ուղղակի դիտարկում իրականացնելու դեպքում ստորագրում է մշտադիտարկում իրականացրած անձը, իսկ օպերատորի մոտ տեղում դիտարկում իրականացնելու դեպքում ստորագրում է կարգավորող պետական մարմնի և օպերատորի ներկայացուցիչը:

18. Մշտադիտարկման արդյունքների վերաբերյալ արձանագրությունը կարող է հիմք հանդիսանալ վարչական վարույթ հարուցելու համար, իսկ հարուցված վարչական վարույթի շրջանակներում ծառայել որպես վարչական վարույթի ապացույց»:

**Օրենքի 60-րդ հոդվածի 8-րդ մասի համաձայն՝** Օրենքն ուժի մեջ մտնելուց հետո ցանցային օպերատորները կարգավորող պետական մարմին տեղեկություն են ներկայացնում իրենց ցանցում վերահաղորդվող տեսալսողական ծրագրերի մասին:

**Օրենքի 49-րդ հոդվածի 1-ին մասի համաձայն՝** Հայաստանի Հանրապետության տարածքում և նրա սահմաններից դուրս գործող Հեռարձակողների տեսալսողական ծրագրերը ցանցային օպերատորի լիցենզիա ստացած անձի կողմից կարող են վերահաղորդվել տեսալսողական ծրագրերի դիստրիբյուտորի կամ հեռարձակողի հետ պայմանագրի հիման վրա:

**Օրենքի 49-րդ հոդվածի 5-րդ մասը սահմանում է՝**

«Վերահաղորդվող տեսալսողական ծրագրերի յուրաքանչյուր փոփոխության վերաբերյալ ցանցային օպերատորը տեղեկացնում է կարգավորող պետական մարմնին:»:

Հանձնաժողովի կողմից ուսումնասիրվել են վարչական վարույթի նյութերը, և առաջնորդվելով ինչպես գործում առկա, այնպես էլ ներկայացված ապացույցներով՝ ուսումնասիրության արդյունքում Հանձնաժողովն ամրագրում է, որ ցանցային օպերատորի կողմից 2024 թվականի փետրվարի 19-ին Հանձնաժողով է ներկայացվել վերահաղորդվող տեսալսողական ծրագրերի ցանկը, որտեղ չեն եղել խնդրո առարկա հանդիսացող տեսալսողական ծրագրերը՝ խախտելով 49-րդ հոդվածի 1-ին մասի դրույթի պահանջը:

«Հեղինակային իրավունքի և հարակից իրավունքների մասին» օրենքի 39-րդ հոդվածի 1-ին մասի համաձայն՝ այլ անձինք ստեղծագործությունը կարող են օգտագործել միայն ստեղծագործության նկատմամբ գույքային իրավունքները կրող անձի (ստեղծագործության հեղինակ կամ այլ անձ, որին այդ իրավունքներն անցել են օրենքով սահմանված կարգով, այսուհետ՝ իրավատեր) թույլտվությամբ՝ հեղինակային պայմանագրի հիման վրա, եթե սույն օրենքով այլ բան նախատեսված չէ:

Նույն օրենքի 65-րդ հոդվածի 1-ին մասի համաձայն՝ սույն օրենքով պահպանվող ստեղծագործության կամ դրա էական մասի կամ հարակից իրավունքների օբյեկտի ցանկացած օգտագործում անօրինական է, եթե նախապես, մինչև նման օգտագործումը ձեռք չի բերվել հեղինակային իրավունքի կամ հարակից իրավունքների իրավատիրոջ թույլտվությունը:

Հանձնաժողովը՝ որպես տեսալսողական մեդիայի ոլորտը կարգավորող պետական մարմին, Օրենքով վերապահված իր վերահսկողական լիազորություններն իրականացրել է ցանցային օպերատորի գործունեության մշտադիտարկում՝ տեղում դիտարկում իրականացնելու միջոցով և դիտարկման արդյունքում 2024 թվականի ապրիլի 15-ին կազմված արձանագրությամբ նշված տեսալսողական ծրագրերի և ցանցային օպերատորի կողմից Հանձնաժողով ներկայացված վերահաղորդվող տեսալսողական ծրագրերի ցանկի համադրության արդյունքում արձանագրել է, որ ցանցային օպերատորի կողմից փաստացի վերահաղորդվում են մի շարք տեսալսողական ծրագրեր, որոնք բացակայում են վերջինիս կողմից ներկայացված տեսալսողական ծրագրերի ցանկից:

Հանձնաժողովի կողմից ուսումնասիրվել են վարչական վարույթի նյութերը, որոնք համադրվել են Հանձնաժողովի՝ տեղում դիտարկման արդյունքներին, ներկայացված տեսալսողական ծրագրերի ցանկին, և հայտնի է դարձել, որ ցանցային օպերատորն իր գործունեությունն իրականացնում է՝ խախտելով Օրենքի 49-րդ հոդվածի 1-ին մասի պահանջը:

Այսպիսով, վարչական վարույթի նյութերի ուսումնասիրության արդյունքում ամրագրում ենք, որ Օրենքի 49-րդ հոդվածի 1-ին մասով ցանցային օպերատորի լիցենզիա ստացած անձի համար պարտավորություն է սահմանված Հայաստանի Հանրապետության տարածքում և նրա սահմաններից դուրս գործող Հեռարձակողների տեսալսողական ծրագրերը վերահաղորդել տեսալսողական ծրագրերի դիստրիբյուտորի կամ հեռարձակողի հետ պայմանագրի հիման վրա:

Փաստում ենք նաև, որ ցանցային օպերատորը 2021 թվականի հունիսի 11-ից (սփռման տարածքը՝ ք. Երևան) հանդիսանում է Հանձնաժողովի կողմից լիցենզավորված իրավաբանական անձ և պարտավոր է պահպանել տեսալսողական մեդիայի բնագավառը կարգավորող օրենսդրության պահանջները, իսկ Օրենքի դրույթները խախտելու դեպքում կրել պատասխանատվություն օրենքով սահմանված կարգով, ուստի Օրենքի պահանջի չկատարումն ինքնին բերում է պատասխանատվության:

Ցանցային օպերատորը պետք է հաշվի առնի, որ օրենքներով հստակ սահմանվում են իրավական նորմեր, որոնց չպահպանելն առաջացնում են իրավական հետևանքներ, և ցանցային օպերատորը պատասխանատվություն է կրում տեսալսողական մեդիայի ոլորտը կարգավորող օրենսդրության կիրառման ապահովման համար և տվյալ դեպքում ցանցային օպերատորը պարտավոր էր պահպանել Օրենքի 49-րդ հոդվածի 1-ին մասով սահմանված դրույթի պահանջը:

Հաշվի առնելով այն փաստը, որ տեղում դիտարկման արդյունքում պարզվել է, որ ցանցային օպերատորի կողմից վերահաղորդվում են նաև «Родное кино», «Кинопреьера», «НТВ», «ТНТ», «MTV 00s», «RU TV», «Mezzo», «Боец» և «Мир 24» տեսալսողական ծրագրերը, իսկ ցանցային օպերատորի կողմից նշված տեսալսողական ծրագրերի վերահաղորդումն իրականացվում է առանց պայմանագրերի, ինչպես նաև «Кинохит ТВ», «Индийское кино», «Кухня», «365 Дней ТВ», «ТНТ Music», «Карусель», «Дом кино», «Бобёр», «Первый канал:всемирная сеть», «Телекафе», «National Geographic», «Nat Geo Wild», «Nikelodeon», «Fox» «СТС», «РЕН ТВ», «5 Канал», «Перец» և «ТБЦ» տեսալսողական ծրագրերը, որոնց վերահաղորդման գործողության ժամկետները լրացել են, և միայն վարչական վարույթի շրջանակներում ցանցային օպերատորի կողմից խնդրո առարկա հանդիսացող տեսալսողական ծրագրերից Հանձնաժողով են ներկայացվել «Nat Geo Wild», «Nikelodeon», «Fox» «СТС», «РЕН ТВ», «5 Канал», «Перец» և «ТБЦ» տեսալսողական ծրագրերի գործողության ժամկետների երկարաձգման վերաբերյալ իրավական հիմքերը, ուստի վարչական վարույթի բազմակողմանի, լրիվ և օբյեկտիվ քննության, ձեռք բերված ապացույցների ուսումնասիրության և գնահատման արդյունքում Հանձնաժողովն արձանագրում է, որ խախտվել է Օրենքի 49-րդ հոդվածի 1-ին մասի պահանջը:

Այսպիսով, ցանցային օպերատորի կողմից իրականացվել է իրավախախտում, որը համապատասխանում է Օրենքի 57-րդ հոդվածի 6-րդ մասի հատկանիշներին:

**Օրենքի 32-րդ հոդվածի 1-ին մասի 11-րդ կետի համաձայն՝** կարգավորող պետական մարմինը Օրենքի խախտման կամ իր որոշումները չկատարելու դեպքում կիրառում է պատասխանատվության միջոցներ:

**Օրենքի 55-րդ հոդվածի 1-ին մասի համաձայն՝** կարգավորող պետական մարմնի կողմից տեսալսողական մեդիայի բնագավառը կարգավորող օրենսդրության պահանջների խախտման դեպքեր հայտնաբերվելու, ինչպես նաև պետական այլ մարմինների կողմից իրենց իրավասությունների շրջանակում տեսալսողական մեդիայի բնագավառը կարգավորող օրենսդրության պահանջների խախտման դեպքեր հայտնաբերվելու և դրանց մասին կարգավորող պետական մարմնին գրավոր տեղեկացվելու դեպքում կարգավորող պետական մարմինը կիրառում է հետևյալ վարչական տույժերը.

- 1) գրավոր նախազգուշացում.
- 2) տուգանք.
- 3) հեղինակազորման կամ լիցենզիայի գործողության կասեցում.
- 4) հեղինակազորման կամ լիցենզիայի գործողության դադարեցում:

**Օրենքի 57-րդ հոդվածի 6-րդ մասը սահմանում է՝**

«Ցանցային օպերատորի կողմից առանց պայմանագրի վերահաղորդում իրականացնելը առաջացնում է տուգանքի նշանակում՝ Հասույթի 0.04 տոկոսի, բայց ոչ պակաս, քան սահմանված նվազագույն աշխատավարձի հիսնապատիկի չափով:»

Հանձնաժողովի 2023 թվականի մայիսի 22-ի թիվ 45-Ա որոշմամբ ցանցային օպերատորը վարչական պատասխանատվության է ենթարկվել Օրենքի 57-րդ հոդվածի 6-րդ մասի համաձայն՝ տուգանվելով նվազագույն աշխատավարձի հիսնապատիկի չափով: Վարչական տույժ կիրառելու հիմք է հանդիսացել ցանցային օպերատորի կողմից տեսալսողական ծրագրերն առանց պայմանագրի վերահաղորդում իրականացնելու Օրենքի պահանջի խախտման փաստը, ինչը նույնական է նաև տվյալ դեպքում:

**Օրենքի 57-րդ հոդվածի 31-րդ մասը սահմանում է՝**

«Սույն հոդվածի 2-30-րդ մասերով սահմանված հիմքերով վարչական տույժի ենթարկված անձի կողմից մեկ տարվա ընթացքում նույն խախտումը կրկնելը

առաջացնում է տուգանքի նշանակում՝ կիրառված տույժի եռապատիկի չափով:»:

Հանձնաժողովն արձանագրում է, որ ցանցային օպերատորը մեկ տարվա ընթացքում կրկնել է նույն խախտումը՝ տեսալսողական ծրագրերն առանց պայմանագրի վերահաղորդում իրականացնելով, որը համապատասխանում է Օրենքի 57-րդ հոդվածի 31-րդ մասի հատկանիշներին:

Ելնելով վերոգրյալից և ղեկավարվելով «Տեսալսողական մեդիայի մասին» օրենքի 2-րդ հոդվածի 1-ին մասով, 32-րդ հոդվածի 1-ին մասի 11-րդ և 14-րդ կետերով, 42-րդ հոդվածով, 49-րդ հոդվածի 1-ին և 5-րդ մասերով, 55-րդ հոդվածի 1-ին մասի 2-րդ կետով և հիմք ընդունելով Օրենքի 57-րդ հոդվածի 31-րդ մասը՝ Հեռուստատեսության և ռադիոյի հանձնաժողովը **որոշեց.**

1. «ՀՈՎՆԵՏ» ՍՊ ընկերության նկատմամբ կիրառել «Տեսալսողական մեդիայի մասին» օրենքի 57-րդ հոդվածի 31-րդ մասով սահմանված տույժը՝ տուգանելով կիրառված տույժի եռապատիկի չափով՝ 150 000 (մեկ հարյուր հիսուն հազար) ՀՀ դրամի չափով:
2. Սույն որոշումն ուժի մեջ է մտնում այն «ՀՈՎՆԵՏ» ՍՊ ընկերությանը պատշաճ ձևով հանձնելու օրվան հաջորդող օրվանից:
3. Սույն որոշումը կարող է բողոքարկվել ՀՀ վարչական դատարան՝ ուժի մեջ մտնելու օրվանից երկամսյա ժամկետում:

**ՀԵՌՈՒՍԱՏԵՍՈՒԹՅԱՆ ԵՎ ՌԱԴԻՈՅԻ  
ՀԱՆՁՆԱԺՈՂՈՎԻ ՆԱԽԱԳԱՀ**

**Տ. ՀԱԿՈԲՅԱՆ**

2024թ. մայիսի 08  
ք. Երևան